

王念西先生勝國名翰林理學文章表三
時出其緒餘游藝於岐黃之學以濟人雖
未嘗以專門名一家而其所施治往々奇驗
夫醫自天之陰陽寒暑地之燥濕剛柔以
至昆虫草木之形質性味莫不詳而察
焉其施之於人外而氣色神情內而經絡
部分必先燭然昭晰而尤貴識其歲氣消

長子母勝復之機然後可以治病此即儒
者格物致知窮理盡性之學而非可與方技
同類而輕重之也準繩一書採輯精要議
論曉暢門分類列綦詳且審洵醫學之
金科玉律雖有謂其瘍科痘科未甚詳
備者要不得以此輕議之余不知醫閒居
多暇流覽之餘或間遇篤疾之人每竊取

準繩之意檢方治之輒得效亦異稍有濟
於人可蓋此書流傳足資後學法守特少
善本欲校以付梓顧卷帙浩繁力有不逮
遲之又久至戊戌歲立志刊木積十餘年
而告成其間反覆校勘已數四矣然不敢
以為無訛且往來參訂於青浦王半學
茂才錢塘陸琛紫孝廉二公皆精於醫

者間有舛誤無考者仍之恐失真耳噫醫豈
小道哉若人在死生苦患之際為之調劑使
獲安全真不啻出水火而登之衽席也念
西先生濟人之心深且遠矣後之讀此書
者當亦體其意而恒其心則善爾

乾隆五十八年孟冬之月瘦樵程永培書於

心導樓



證治準繩自叙

余髮始燥則聞長老道說范文正公未達時禱於神以不得爲良相願爲良醫因歎古君子之存心濟物如此其切也當是時顓蒙無所知顧讀岐黃家言輒心開意解若有夙契者嘉靖丙寅母病阨危常潤名醫延致殆徧言人人殊罕得要領心甚陋之於是銳志學醫旣起亡妹于垂死漸爲人知延診求方戶屨恒滿先君以爲妨廢舉業常嚴戒之遂不復窮究無何舉于鄉又十年成進士選讀中祕書備員史館凡四年請急歸旋被口語終已不振因伏自念疊受我

聖主作養厚恩見謂儲相材雖萬萬不敢望文正公
然其志不敢不立而其具不敢不勉以庶幾無負父
師之教而今已矣定省之餘頗多暇日乃復取岐黃
家言而肆力焉二親篤老善病卽醫非素習固將學
之而況乎輕車熟路也於是聞見日益廣而藝日益
精鄉曲有抱沉痾醫技告窮者叩闥求方亡弗立應
未嘗敢萌厭心所全活者稍稍衆矣而又念所濟僅
止一方孰若著爲書傳之天下萬世耶偶嘉善高生
隱從余游因遂採取古今方論參以鄙見而命高生
次第錄之遂先成雜病論與方各八巨表高生請名

余命之曰證治準繩高生曰何謂也余曰醫有五科
七事曰脉曰因曰病曰證曰治爲五科因復分爲三
曰內曰外曰亦內亦外并四科爲七事如陰陽俱緊
而浮脉也傷寒因也太陽病也頭痛發熱身痛惡寒
無汗證也麻黃湯治也派析支分毫不容濫而時師
皆失之不死者幸而免耳自陳無擇始發明之而其
爲三因極一方復語焉不詳李仲南爲永類鈴方枝
分派析詳矣而入理不精比附未確此書之所以作
也曰五科皆備焉而獨名證治何也曰以言證治獨
詳故也是書出而不知醫不能脉者因證檢書而得

治法故也雖然大匠之所取平與直者準繩也而其
能用準繩者心目明也倘守死句而求活人以準繩
爲心目則是書之刻且誤天下萬世而余之罪大矣
家貧無貲假貸爲之不能就其半會侍御周鶴陽公
以按鹺行縣至金壇聞而助成之遂行于世時

萬歷三十年歲次壬寅夏五月朔旦念西居士王肯
堂宇泰識

證治準繩第一冊目錄

諸中門

卒中暴厥

中風

中寒

中暑

中濕

中氣

中食

中惡

五絕

自縊 擗壓 溺水 魘

諸傷門 傷寒傷風別爲一書

傷暑

傷濕

傷燥

傷飲食

傷勞倦

虛勞 療骨蒸熱

傳尸勞

寒熱門

發熱

潮熱

惡寒

振寒 寒痺

氣分寒 血分寒

三焦寒 五藏寒

往來寒熱

外熱內寒 外寒內熱

上熱下寒 上寒下熱

瘧

厥 寒厥 手足冷 足熱 尸厥

熱厥 手

證治準繩第一冊

金壇王肯堂輯

吳門程永培校

卒中暴厥

經云暴病卒死皆屬於火註云火性速疾故也然初治之藥不寒而溫不降而升甚者從治也俗有中風中氣中食中寒中暑中濕中惡之別但見卒然仆倒昏不知人或痰涎壅塞咽喉作聲或口眼喎斜手足癱瘓或半身不遂或六脉沉伏或指下浮盛者並可用麻油薑汁竹瀝調蘇合香丸如口噤挾開灌之或用三生飲一兩加人參一兩煎成入竹瀝二三杯薑

汁少許如挾不開不可進藥急以生半夏爲末吹入
鼻中或用細辛皂角菖蒲爲末吹入得嚏則甦此可
以驗其受病深淺則知其可治不可治

詳見中風條若
門口噤條

口開手撒遺尿者虛極而陽暴脫也速用大料參芪
接補之及臍下大艾灸之痰涎壅盛者宜吐之急

救稀涎散猪牙皂角肥實不蛀者四挺去黑皮晉礬
光明者一兩各爲細末研勻輕者五分重者三字溫
水調灌下又碧霞散揀上色精好石綠研篩水飛再
研取二三錢同冰片三四豆許研勻以生薄荷汁合
溫酒調服之二藥不大嘔吐但微微令涎自口角流

出自甦 舊說口開心絕手撒脾絕眼合肝絕遺尿
腎絕聲如鼾肺絕皆爲不治之症然五症不全見者
速服參芪膏灸臍下亦有得生者 卒中眼上戴不
能視者灸第二椎骨第五椎上各七壯一齊下火炷
如半棗核大 若中人髮直吐清沫搖頭上攬面赤
如粧汗綴如珠或頭面赤黑眼閉口開氣喘遺尿皆
不可治 諸中或未甦或已甦或初病或久病忽吐
出紫紅色者死 傳心方云治男子婦人涎潮於心
卒然中倒當卽時扶入暖室中扶策正坐當面作好
醋炭熏之令醋氣衝入口鼻內良久其涎潮聚於心

者自收歸舊輕者卽時甦醒重者亦省人事唯不可
喫一滴湯水入喉也如喫湯水則其涎永繫於心絡
不能去必成廢人

風邪中人六脉多沉伏亦有脉隨氣奔指下洪盛者
浮遲吉堅大急疾凶 浮遲爲寒 虛大爲暑不當
暑則爲虛 浮澀爲濕 浮大爲風 浮數無熱亦
爲風 微而數浮而緊沉而遲皆氣中 風應人迎
氣應氣口 洪大爲火 滑爲痰 或浮而滑沉
而滑微而虛者皆虛與痰 更當察時月氣候及其
人之起居參以顯症而定病之主名以施治療

中風

中後當如東垣法分中血脉中府中藏施治 靈樞
經云虛邪偏客於身半其入深內居榮衛榮衛稍衰
則真氣去邪氣獨留發爲偏枯故其邪氣淺者脉偏
痛又云偏枯身偏不用而痛言不變志不亂病在分
腠之間巨針取之益其不足損其有餘乃可復也痺
之爲病也身無痛者四肢不收志亂不甚其言微知
可治甚則不能言不可治也此內經論中風之淺深
也其偏枯身偏痛而言不變志不亂者邪在分腠之
間卽仲景東垣所謂邪中府是也痺病無痛手足不

收而言瘖志亂者邪入於裏卽仲景東垣所謂邪中藏是也

中血脉外有六經之形症則以小續命湯加減及疎風湯治之 太陽經中風無汗惡寒於續命湯中加麻黃防風杏仁一倍針太陽經至陰出血崑崙舉蹻有汗惡風於續命湯中加桂枝芍藥杏仁一倍針風府 陽明經中風無汗身熱不惡寒於續命湯中加石膏二兩知母二兩甘草一兩有汗身熱不惡風於續命湯中加葛根二兩桂枝黃芩各一倍針陷谷刺厲兌 太陰經中風無汗身涼於續命湯中加附子